

UKA 2017/071-01

26-10-2017

Inatsisartut aalajagiiffigisassaattut siunnersuut Naalackersuisut peqquneqassasut Nunatsinni nioqqutissat akiisa OECD-imi inuussutissat naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissussagaat. Misissuinerup malitsigissariaqassavaa iluarsisogarnissaanut kiisalu ungasinnerusoq eqqarsaatigalugu qanoq akit appartinnissaannut siunnerfimmik aaqqisoqassasoq. Misissuineq UKA 18-imi inatsisartunut saqqummiunneqassasoq innersuussutigineqarluni.

(Inatsisartuni ilaasortaq, Per Rosing-Petersen, Partii Naleraq).).

Inatsisartuni ilaasortap, Per Rosing-Petersen, Partii Naleraq-miit Inatsisartut aalajagiiffigisassaattut siunnersuutaa, tassa Naalackersuisut peqquneqassasut Nunatsinni nioqqutissat akiisa OECD-imi inuussutissat naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissuiffigineqarnissaanut tunngasoq Partii Naleraq sinnerlugu imannaq oqaaseqarfigissuarput:

Siunnersuut tamakiissumik taperserparput, tassa innuttaasut aamma pissakinnerit sapinngisamik inuuniarnikkut akikinnerusumik pilersorneqarnissaannut atugassaqartinneqarnissaannullu aqqutissat ilagisinnaangaat takorloorsinnaangatsigu.

Maannakkut ajoraluartumik atuisartunut siunnersuisooqatigiit kommunini tamani nioqqutissat akiinik [II.il](#). nakkutilliinermik suliaqartaraluartut atorunnaarsinneqarnikuupput, taamaammallu oqarsinnaavungut atuisartut ullumikkut illersorneqarnerat nioqqutissallu akii pillugit nakkutilliineq atuukkunnarsimasoq.

Tamannalu aamma ersarissorujussuarmik takuneqaarsinnaavoq, tassa nioqqutissat akii ilaatigut sukkasoorujussuarmik qaffakkiartortarput, allaat ilaanni nioqqutissat akii ullormiit ullormut qaffattarput. Aperisariaqarpugut kiap tamakku nakkutigai ?

Uanilu akit qaffasinnerat pingaartumik inoqarfinni isorliunerusuni illoqarfinnilu mikinerusunik malunnarluartoq oqaatigineqarsinnaavoq, taakkunanilu aamma ukiuunerani sumiiffiit ilaanni nioqqutissat ilaat akisoorujussuanngartarput annerusumik nakkutigineqanngitsumik.

Allaammi assersuutigalugu oqaatigisinnaavarput, atuisartut nunaqarfimmiut ilaat qanittukkut paasiuminaatitaminik apeqquteqarpoq, nunaqarfimmi Pilersuisoqarfimmi snecooter-inik pisinermiini soormi pisiami akiviata qaavatigut 10.000 koruuninik akiliisariaqarsimanerluni ?

Neriuppungut apeqqut taanna naalakkersuisut akissuteqarfigisinnaassangaat.

Aamma isumaqarpugut nioqqutissat akiinik iluanaaruteqartarneq pillugu inatsiseqalertariaqartugut (avancelov). Kiisalu Pilersuisoq illoqarfinni anginerusunik unammillersinnaasariaqarpoq, nunaqarfinni illoqarfinnilu mikinerusuni nioqqutissat akiisa sapinngisamik appasinnerpaamiitinneqarsinnaaner at qulakkeerumallugu.

Taama aallarniuteqariarluta inatsisartunut ilaasortap Per Rosing-Petersen-p nioqqutissat akiisa nunanut allanut naleqqiussilluni misissuiffigineqarnissaat pisariaqartoq isumaqarpungut.

Tassungalu tunngatillugu nunatta nioqqutissatigut avataaniit pilersorneqarneranut tunngatillugu Partii Naleqqamiit assut soqutingaarput, nioqqutissanik nunatta avataaniit pilersorneqarneq akikinnerpaaq ujartortariaqarippat isumaqarpugut, tassa atuisartut nioqqutissanik sapinngisamik akikinnerpaanik pilersorneqarnissaat qulakkeerumallugu.

Tassami assersuutigalugu nunatsinni moms atuutinngikkaluartoq nioqqutissat ilaat allaat danmarkimiit akisunerusarmata, naak danmarkimi moms-i ilanngutereerlungu akit naatsorsorneqartaraluartut.

Taamaammat assut soqutingaarput nunatta avataaniit nioqqutissanik pilersorneqarnera taamaallaat naalagaaffeqatitsinniit ingerlanneqassanngitsoq, tassa nioqqutissat assigi maannamut danmarkimiit akisunaarlugit pissarsiarisartakkavut, nunani allani akikinnerusumik pissarsiarisinnaangutsigit - tamanna pisisartumut assut aningaasaqarnikkut oqilisaataasinnaasoq takorloorneqarsinnaammat.

Tassa pisisartut inuuniarnikkut oqinnerusumik atugassaqartinneqarsinnaaner at tassuuna aamma oqilisaaffigineqarsinnaasut isumaqaratta.

Maannakkummi umiarsualivissuaq inuiaqatigiit akiligassaat maani Nuummi naammasseqqammerpoq, taannalu atorluarneqassappat aamma nunatta nioqqutissanik nunatta avataaniit danmark-imiinnaanngitsoq toqqaannartumik pilersorneqarsinnaanera misissoqqarput.

Taama naatsumik oqaaseqarluta siunnersuutip aappassanneerneqannginnerani ataatsimiititaliami susassaqartumi suliarineqarnissaa inassutingaarput.

Anthon Frederiksen